

Редакция „стрелецкая“

Текст по списку БАН 38. 4. 40

Приход чудотворнаго образа святаго Николы Чудотворца ис Корсуня града в Резанскую землю

В лето 6732. Прежде прихождения Батыева поганых татар на Рускую землю, и обладания Корсуня града (ныне же нарицаема погаными Крым) за 12 лет, при великом князи Юрьи и Ярославе Всеволодичех, и сыне его Александре Невском, при великом князе Юрьи Ингоревиче, и брате его Ингоре, и сыне его Феодоре Резанских принесен бысть чудотворный образ великаго чудотворца святителя Христова Николы на Резань ис преименитаго града Корсуня в пределы Резанския области князя Феодора Юрьевича Резанскаго. Таже икона — чудотворный образ святаго Николы — стоял в Корсунни граде посреде града близ торгу, подле церквей святаго апостола Иакова брата господня, и святаго апостола и еуангелиста Иоанна Богослова. В том же храме святаго апостола Иакова крестися самодержавный благоверный великий князь Владимир Светославич Киевский и всеа Русии. И полата есть стояла велика и красная за олтарем святаго Николы. В ней же и браку сочтася, и венчася с царицею греческих царей Василья и Константина сестрою их Анною. Мы же о чем начахом повесть творити поведаем сице. Явися великий чудотворец святыи Николае в преименитом граде Корсунни служителю своему именем Евстафию в видении и рече ему: „Евстафие, взем мой чудотворный образ Корсунский, и супругу свою Феодосию, и сына своего Евстафия и иди в Русь в землю Резанскую: тако бо господу богу моему волящу моему образу, и тебе тамо преселитися“. Евстафий же убудися от сна трепетен, и во ужасе быв велице о преславном видении. И начат в себе помышляти: „Что есть сие видение и сказание святаго чудотворца Николы? Где есть земля Резанская, и како ми обрести ю, и коим путем пойду — не вем о сем. И кто мя наставит тамо“. И пришед в церковь святаго Николы начат молитися пред образом святаго со слезами глаголя: „О великий святителю чудотворче Николае! Что твое изволение — отити хоцещи от своего града и от своая церкви в чужду и незнаему страну! И мене грешнаго нудиши оставити свое отечество, и дом свой, и сродники. Камо ми итти величи святче божий? Аз раб твой ни земли Резанския знаю, ниже слышах о ней. И не вем яко та земля на восток, или на запад, или на юг, или на север. И не вем камо в кий путь пуститися: морем или землею. Но ты ми, божий угодниче, путь покажи — амо же ми поити“. И тако о сем в себе помышляя. В третью же ночь паки явися ему великий чудотворец святыи Николае в нощи, и ткну в ребра его рече: „Востани и немедли! Иди скоро в путь с моим образом. Аз тя доправити имам до Резанския земли на свое место — амо же бог повеле“. Евстафий же трепетен бысть от такового видения, и размышляя в сердцы своем: како оставити предивнаго града Корсуня дом и сродники своя. И абие нападе на него болезнь главная. И не по